

Remeton en question lo Tractat de Lisbona

Raoul-Marc Jennar foguèt convidat per l'associacion altermondialista « Gardarem la Terra » a far una conferéncia sus Euròpa après lo « non » al TCE.

Dempuèi 2005, òm se demandava çò qu'èran devenguts los « nonistas » e çò que vòlon per la bastison d'Euròpa. A man esquèrra, òm auríá poscut supausar que tot aquel malhum foguèt escobat pel fracàs de l'esquèrra anti-liberal a l'eleccion presidenciala. Es pas çò que pensa lo cercaire e politològue altermondialista Raoul-Marc Jennar que devíá ténher una conferéncia a Besièrs lo 21 de genièr en partenariat amb l'associacion « Gardarem la Terra ». S'agiguèt de se demandar quina Euròpa i auríá après lo « non » e sustot après la ratificacion del Tractat de Lisbona mai conegut jol chafre de « tractat simplificat » que foguèt promogut per Angela Merkel e Nicolas Sarkozy. Per çò qu'es del malhum anti-TCE (que se tornèt en malhum anti-liberal per la seguida) mas sustot per çò qu'es de son esclatament, Jennar designa dos responsables : lo PCF e la LCR. « An privilegiat las preocupacions d'aparelh sus l'indispensabla unitat, çò ditz, e daissèt de traças prigondas qu'aguèron per efèit de rendre dificila una novèla mobilizacion de los que faguèron campanha dos ans a pel non ». En decembre, se constituiguèt un comitat pel non al referèndum (CNR, en allusion al Conselh Nacional de la Resisténcia) que lancèt una peticion per far votar lo tractat de Lisbona per via referendària. A l'ora d'ara auríá reculhit 80000 signaturas. Lo constat que tira Raoul-Marc Jennar rapòrt a aquel tractat es que se vòl far votar per via parlamentària un tèxte que foguèt regetat per

via referendària. « Es pas un TCE revist e corregit dins la mesura qu'es pas mai una constitucion, çò ditz, (...) lo drapèu, los imnes, la devisa s'i tròban pas mai. La tresena partida del TCE, valent a dire la colleccion dels tractats existents, foguèt levada. En contra, òm tòrna trobar integralament, a la virgula prèp, tot çò novèl dins lo TCE rapòrt a aqueles tractats existents. A ieu me truca lo fait qu'òm aja pas progressat e qu'òm aja pas pres en compte los arguments de los que sens èstre contra Euròpa formulavan de criticas sul biais qu'Euròpa a de se bastir. »

Lo Parlament serà totjorn « curron »

Dins los progrèsses que desiran los « nonistas » i a una melhora democratizaciòn de las institucions e una vision clara de la reparticion de las competéncias entre Euròpa e institucions infra-europèas. En d'autres tèrmis un reequilibratge dels poders entre Comission europèa e Parlament europèu. Segon Jennar, lo compte i es pas amb lo Tractat de Lisbona que mantendriá lo Parlament (malgrat d'unas avançadas que reconeissèn) dins lo ròtle de Parlament « curron ».

D'un punt de vista financièr, lo Parlament europèu poirà pas votar las recèptas mas poirà votar las despensas. Serà doncas en mesura de decidir d'investiments sens èstre en mesura de decidir cossí los finançar. D'un punt de vista

juridic, lo Parlament pòt totjorn pas prepausar sos pròpris tèxtes.

Aquò es degut a un principi que se ditz lo « monopòli d'iniciativa » de la Comission qu'es la sola a poder prepausar e qu'es en mesura de refusar de proposicions vengudas de las autras institucions europèas. « Lo Parlament europèu a desirat mai d'un còp que la Comission prepausè un tèxte suls « servicis d'interès general » que coneissèm nosautres jol nom de « servicis publics », çò explica Raoul-Marc Jennar, per ideologia, la Comission, qu'es puslèu portada cap a una logica de privatizaciòn, refusa de presentar un tèxte aquí dessus. Aquò vòl dire que lo Parlament europèu, qu'es eisit directament del sufragge universal, se pòt far barrar la pòrta per la Comission europèa qu'es eissida de negociacions diplomaticas. (...) Per ieu serà malaisit de parlar de democracia al nivèl europèu mentre que la Comission europèa aurà lo monopòli de proposicion. »

L'AGCS per deman ?

Los quites servicis publics tals coma se concebon en França serián menaçats per una refòrma dels articles 131 e 133 dels tèxtes actuals dins l'encastre del tractat de Lisbona. Concernisson las negociacions internacionals e especialament las negociacions comercials internacionals amb l'organizacion mondiala del comèrci (OMC).

La volontat primièra èra de simplificar aquelas negociacions per la designa-

cion d'un interlocutor unic que representa l'Union europèa (sián los 27 païses-membres). Aquel interlocutor es lo comissari europèu al comèrci internacional. Fins ara, per prendre de decisions dins l'encastre de negociacions bilaterals o multilaterals, devíá aver l'acòrd d'un comitat dit « comitat 133 » ont son representats los Estats-membres. Aquel acòrd podíá pas qu'èstre donat a l'unanimitat. Ara poirà èstre donat a la majoritat.

Or se discutís a aquel comitat lo biais de poder metre en òbra de tèxtes eissits de l'OMC coma l'acòrd general sul comèrci dels servicis (AGCS). L'objectiu final de l'AGCS es d'arribar a la privatizaciòn de l'ensemble de las activitats de servici dins los 155 païses-membres de l'OMC. Segon Raoul-Marc Jennar, seriá la pòrta dobèrta a la somission dels servicis publics locals a las règlas de l'AGCS : « En facilitant la presa de decision del comitat 133 se facilita la voluntat de la Comission europèa que se sap que vòl privatizar aqueles servicis dins l'espaci europèu. Se facilita doncas sa possibilitat per la Comission europèa de botar a la privatizaciòn dels servicis nacionals, regionals e locals. »

Quid de las collectivitats que se declarèron fòra-AGCS ? I aguèt un jutjament del tribunal administratiu de Clarmont d'Auvèrnha subvengut en seguida d'una garolha entre un prefècte e una comuna que se volguèt declarar fòra-AGCS. Lo primièr volguèt rompre la decision de la segonda. Un còp sasit, lo tribunal administratiu estatuèt que mentre que las negociacions que son en cors a l'OMC son pas acabadas, las collectivitats son pas tengudas de las aplicar. « Lo procediment de se declarar fòra-AGCS demòra pertinent mai que sempre, çò comenta En Jennar, es un messatge fòrt de mandar als bailejaires governamentals dins cada país e es un procediment qu'es pas sonque francés. Per exemple, mai de 35 % de las municipalitats d'Àustria son fòra-AGCS, es una fòrça bona causa que deu contunhar. » Raoul-Marc Jennar devíá contunhar sa virada fins al 29 de genièr. Nos assegurèt qu'al cors de las conferéncias passadas, parlèt davant maites centenats de personas a cada còp. Se l'opcion referendària èra mai qu'incèrta, la motivacion d'aquel cercaire vallon l'èra pas.

Clamenç Pech

Inf. : <http://gardaremlaterra.free.fr>

Podètz legir : Raoul-Marc Jennar « Quelle Europe après le non ? » Edicions Fayard, París, 2007.



Raoul-Marc Jennar participèt al forum organizat per « Gardarem la Terra » a la manifestacion de Besièrs. (Fòto LS)